



Nuuk, 27. april 2015

Hans Enoksen

UPA2015/41

Inatsisartunut ilaasortat ulloq taanna Inatsisartunut qinerneqarnerminniit (ulloq qinersivik) aatsaat akissarsiaqartalernissaat pillugu Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaani nr. 22-mi, 18. december 2003-meersumi (Aningaasarsiat pillugit Inatsit) § 2 imm. 1-p allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

UPA2015/42

Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaani nr. 22-mi, 18. december 2003-meersup (akissarsiaqarnermut Inatsit) imatut allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut:

- 1) Naalakkersuisuni Inatsisartuniluunniit ilaasortaasimasut sivilunerpaamik ilaasortaajunnaarnerisarsinnaatitaanerat apparneqassaaq qaammatini aqqaneq-marlunniit qaammatinut arfinilinnut.**
- 2. Inatsisartuni Naalakkersuisuniluunniit ilaasortat ukiup atuuffiusup ataatsip allartinnerani ilaasortaajunnaarnerisutisiassaasat qaammammik ataatsimik ilaneqartassapput.**
- 3. Ilaasortaajunnaarnerisutisiaqarnissap sivilinnerpaaffia maannakkut qaammatinik pingasunik sivilussuseqartoq qaammammut ataatsimut apparneqassaaq.**

(Inatsisartunut Ilaasortaq Randi Vestergaard Evaldsen, Demokraatit)

Siullermeerneqarneri

Inatsisartunut ilaasortaq Randi Vestergaard Evaldsen, Demokraatit siunnersuuteqarpoq oqaluuserisassanik marlunik Inatsisartuni sulinermi aningaasarsiatigut appaasoqarnissaanik, tamannalu Partii Naleqqamiit oqaaseqarfigissavarput.

Inatsisartunut ilaasortatut suliaqarneq tassaavoq pisussaaffigalugu inuiaqatiginni kiffartuussilluni suliffik, suliffik aamma pilluarnerinnarmik atugaqarfiunngitsoq, ilaatigullu inuttut annertooujussuarmik Inatsisartunut Naalackersuisunullu ilaasortanut malersuerujussuarnermik misigisaqarfiusinnaasartoq.

Tamannalumi aamma ilaqtannut allaat sunniuteqarpiluttarluni, allaat kinaassuseerunnermik inuttut akerartugaarujussuarnermik kinguneqartarluni, tassaavorlu politikerip ilaqaataasaalu aqquartortagaasa ilaat, tamannalumi aamma meeqqatsinnut kingunipiloqartarpoq inuttut nakkarsarujussuarlugit malersuinermik kinaassusiiarlugit ilungersunarluinnartumik.

Ilaatigut nalilersuisoqartarpoq atukkagut ajunngilluinartut, aningaasarsiaqarpallaartugut sippulimmillu atugarissaartinneqartugut. Kisiannili tamanna eqqortuunngivissoq ukiorpaalunni uanga ilaasortatut misigisakka tunngavigalugit oqaatigerusuppara.

Inatsisartunut ilaasortatut Inuttut pilliutigut annertusaqaat, ilaatigut ilaqtariit inuuniarnikkut inuunermikkullu allangorujussuortarput, ilaqttagut meeqqagullu ullorpassuit sumiginnarlugit qimassimasarpagut.

Inatsisartunut ilaasortat mikisunik meerallit assorujussuaq eqqornerlunneqartarput, ernguttat meeqqallu ilaminut angajoqqaaminnut, aataakkunnut, aanaakkunnut maqaaserujussuortarput, ilaatigullu inuunermikkut innarlerneqartarput Inatsisartunut ilaasortanut ilaqaataannullu kingunipiluttumik naak oqartoqartaraluartoq pilluarnerinnarmik inuusugut, taamatullu eqqarsartarneq misigisaatsuunermik qaammaasallu killeqarpallaarneranik pissuteqartarpoq.

Inatsisartunut ilaasortat aningaasarsiaannik appaaniarneq pissusissamisuunngilaq, sinerissamiit aggerluni ullorpassuit peqanngittarnermi akilersugassat aamma malinnaasinneqartarput qujanartumillu aningaasarsiortunik ilaqaqartaratta ikioqatigiittarpugut naak pilliutigut annertugaluqisut.

Inatsisartuni Naalackersuisunilu ilaasortat ilaatigut angerlarsimaffinnut marlunnut akilersuilersarput, tassami imaanngimmat Naalackersuisunut Inatsisartunullu ilaasortanngoraanni sumiiffimmi najukkagut annaassagigut uteruttalu angerlarsimaffeerutissasugut, soorunami inuiaqatiginni kiffartuussisut taamak pineqarsinnaanngillat.

Naalackersuinikkut suliaqaleraanni imassaunngilaq ilaqtat uagutsinnullu pilliutigissasugut, inunnimmi allanik allaanerunngivippugut, taamaattumik nuannaariarluta Inatsisartunut

ataatsimiigiarneq ajorpugut, pilliuteqartaqaagut ilaatigullu immitsinnut akigisarluta, uffalu pisussaaffigalugu inuiaqatigiinni pisussaaffittut kiffartuussilluta sulisussaataasugut, atugarissaaqisugullu qinersisartunik eqqarsartoqarluni, tamannalu anguneqarsimangilluinnarpoq.

Inatsisartunut Naalakkersuisunullu ilaasortaasimagaanni qinikkatut tunuarluni ilaasortaajunnaarnermi inuttut ingerlaqqinniarneq ilungersunartumik inissittarpoq.

Suliffittoqqamut uterniartarneq oqitsuinnaaneq ajorpoq, atorfigisaq allamik inuttaqalersimasarpoq, ingerlaannartumillu suliffimmut utertoqarsinnaanngilaq, uffalu inuiaqatigiinni pisussaaffigalugu kiffartuussilluni sullissisimalluni, ilaatigullu suliffimmut utertoqarsinnaasarani tamannalu Inatsisartuusimasunut Naalakkersuisuusimasunullu oqitsuinnaaneq ajorpoq.

Taamaattumik ilaasortaajunnaarnerisutitunik appaaniarneq pissusissamisunngilluinnarpoq taassumalu siunnersuutip tamakkiisumik Partii Naleqqamiit nangaanngivilluta itigartissavarput.

Inatsisartuni ilaasortaaneq soorunami aamma nuannersorpasuaqarpoq, anguniakkanik ikiuiniarluni ilungersorluni sullissisarneq nukissaqalersitsisarpoq, tamannalumi piumasuseqarnerulermik kinguneqartarpoq inuiaqatigiinnut atukkatsigut pitsaanerulersitsiniarnermi, soorunami aamma “akerarpassuaqalertarpugut inuttut” ilaatigummi Inatsisartunut ilaasortat Naalakkersuisullu akerartugassaannartut isigineqartarput, tamannalu pissusissamisunngilaq, inoqatinullu ataqqinninnginerujussuarmik takutitsinerusarpoq, tupinnaqaarlu politikerit inuttut malersorneqarujussuarternerat.

Inuinnaavugummi allatulli misigissuseqartugut uummateqartugullu, nalunngilarpummi silaqassutsimik pigisaqaratta ataqqineqarluta ataqqinnillutalu pisussaagatta, inuttut politikerit isumaqatiginngikutsigit, inunnut allanulluunniit isumaqataanngikkaluaruttaluunniit ataqqinnittussaagatta tullimut asanninneq siuararterniartigu “akerassarsiorneq akerartugassarsiornerlu inuiaqatigiinni annertuallaaqaaq” asulilu nukillaarsaataavoq tamanna uannut ilinnullu.

Naalakkersuisut Inatsisartullu Siulittaasorisimasaat inuiaqatigiinnut ilaatigullu inuttut nunatsinnut pilliuteqaqaluni sullissingaarsimasoq ataqqinartoq Jonathan Motzfeldt qanoq inoqatiminut akerlerisaminullu ataqqinnilluni sullissisarnera ilinniarfigisimagakku oqaaserisartagaalu una uummatinnut pulanikuuvoq puigunngisaannagassannik:

“Politikkertassaagut kisianni ikinngutigiinnerput puigussanngilarput.”

tassaniippoq inoqatinut ataqqinnineq, akerassarsiorunnarluta asannineq siaruarterniartigu.

Kalaaleqatigiittugut uagutsinnut nukillaarsarata nukittorsarniarta, ilagut katagarpagut
nikassarlugillu, tamannalu ileqqussaangilaq.

Kiisalu Inatsisartutut suliaqarluni angalanermi inuppassuit ilassiorlutik pisarnerat
nukissarsiffigisaqaarput inuunerullu qanoq atornissaanik ilinniartittarpaatigut, qujanarlu tamanut.